


TEZAU LITURGIC
9 MARTIE

SLUJBA
SF. PREOT
TEODOSIE
LEVITŢKI
DE LA BALTA



MOSCOVA, 2000



Служба святому праведному отцу нашему Феодосию, пресвитеру Балтскому

На велицей вечерни

Блажен муж: 1-й антифон.

На Господи, возвах: стихирь, глас 4.

Приидите вси, вернии, / днесь стецемся на похвалу праведника богомудраго, / Феодосия, пастыря многомилостиваго, / светом жития своего заблудшия души просвещающаго, / теплою любовию хладныя сердца наша согревающаго, / чудесы преславными немощи наша врачующаго / и выну благодарение Богу за вся приносити научающаго.

Возликовствуем, православных собори, / в светлей памяти отца нашего Феодосия, / не отлучающагося духом от паствы своея, / но выну посещающаго нас славными чудесы / и молящагося пред Престолом Вседержителя / за град свой и люди, / и за всех любовию почитающих святое имя его.

Восхвалим, братие, сердцем и устны / дивнаго светильника земли Одесския, / града Балты пастыря богомудраго, / Феодосия, отца сирых и страннх питателя, / чудотворца славнаго и

духов злобы прогонителя / и теплейшаго за нас
к Богу молитвенника.

Ины стихиры, глас 8.

Подобен: О, преславнаго чудесе:

О, преславнаго чудесе! / Вертоград жития
иноческаго, / праведне отче наш Феодосие, / на
месте трудов твоих прозябл еси. / И днесь
обитель твоя ликует, / прославляюще подвиги и
чудеса твоя, / и людие твои прилежно молят тя:
/ испроси душам нашим велия милости / у
Единого Благоутробнаго.

О, преславнаго чудесе! / Како твоему граду, отче
Феодосие, / явленно многоцелебное сокровище
— / мощи твоя чудотворныя? / Ихже мы
обстояще и любовию лобызающе, / милости от
тебе приемлем неоскудно, / и благодарне вопием
ти сице: / о, великих дарований твоих, святе, /
имиже Христос одарил тя есть, яко
Благоутробен.

Праведне отче Феодосие, / кто возможет изрещи
терпение твое, / бдения нощныя, / слезы и
колен преклонения? / Тебе, паче всего Господа
возлюбльшему, / приносим похвалы сия / и
милостивно просим, / пастырю наш предобрый,
/ помяни нас у Престола Славы Единого
Благоутробнаго.

Слава, глас 6:

Звезду пресветлую, добродетельми сияющую, /
Феодосия, восхвалим всеусердно, / от Балты
града возсиявшую, / от Христа же — Солнца
Правды — свет восприимшую / и незаходимо
всех нас озаряющую / словесы ведения и
святости благодатию / путь нам к Небеси
указующую, / идеже всех веселящихся жилище
/ и благочестия мзды восприятие.

И ныне, глас тойже: Кто Тебе не ублажит:

Вход. Прокимен дне, и чтения 3.

Притчей чтение (главы 10, 3 и 8):

Память праведнаго с похвалами, и
благословение Господне на главе его. Блажен
человек, иже обрете премудрость, и смертен,
иже уведе разум. Лучше бо сию куповати,
нежели злата и сребра сокровища. Честнейшая
же есть камней многоценных, все же честное
недостойно ея есть. Долгота бо дней и лета
живота в деснице ея; в шуйце же ея богатство и
слава. От уст ея исходит правда, закон же и
милость на языке носит. Послушайте убо мене, о
чада, честная бо реку: и блажен человек, иже
пути моя сохранит: исходи бо мои, исходи
живота, и уготовляется хотение от Господа. Сего
ради молю вас, и предлагаю мой глас сыновом

человеческим: яко аз, премудрость, устройх совет и разум и смысл аз призвах: мой совет и утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо, незлобивии, коварство, ненаказаннии же, прилагайте сердца. Послушайте мене и паки, честная бо реку, и отверзу от устен правая; яко истине поучится гортань мой, мерзки же предо мною устны лживыя. С правдою вси глаголы уст моих; ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Притчей чтение (главы 10 и 11):

Уста праведнаго каплют премудрость: язык же неправеднаго погибнет. Устне мужей праведных каплют благодати, уста же нечестивых развращаются. Мерила льстивая мерзость пред Господем: вес же праведный приятен Ему. Идеже аще внидет досаждение, тамо и безчестие: уста же смиренных поучаются премудрости. Совершение правых наставит их, и поползновение отрицающихся упасет их. Не пользуют имения в день ярости, правда же избавит от смерти. Умер праведный, остави

раскаяние: наручна же бывает и посмеятельна нечестивых пагуба. Правда непорочнаго исправляет пути, в нечестие же падает неправда. Правда мужей правых избавит их: безсоветием же пленяются беззаконнии. Скончавшуся мужу праведну, не погибнет надежда: похвала же нечестивых погибнет. Праведник от лова убежит, вместо же его предается нечестивый. Во устех нечестивых сеть гражданином, чувство же праведных благопоспешное. Во благих праведных исправится град, усты же нечестивых раскопается. Ругается гражданином лишенный разума, муж же мудрый безмолвие водит.

Премудрости Соломоновы чтение (глава 4):

Праведник, аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости, житие нескверное. Благоугоден Богу быв, возлюблен бысть, и живой посреде грешник, преставлен бысть. Восхищен бысть, да не злоба изменит разума его, или лесь прельстит душу его. Рачение злобы помрачает добрая, и парение похоти пременяет ум незлобив. Скончався в мале, исполни лета долга. Угодна бо бе Господеви душа его. Сего ради потщася от

среды лукавствия. Люди же видевше, и не
разумевше, ниже положше в помышлении
такое: яко благодать и милость в преподобных
Его, и посещение во избранных Его.

На литии стихиры храма и святого, глас 1:

В священной памяти твоей, / праведне отче
наш Феодосие, / верныя благодатию озаряеши /
и недуги человеческия безмездно врачуеши /
единым прикосновением к честным мощем
твоим, / темже, с любовью припадающе,
умиленно глаголем: / молися, чудотворче
предивный, Триипостасному Богу / помилуй
души наша.

Слава, глас тойже:

Чувственныя страсти победив воздержанием, /
верных души озарил чудес лучами, / и ныне,
отче наш Феодосие, / твоими молитвами
благодатно озари / и просвети сердца наша к
деланию заповедей Господних.

И ныне, Богородичен, глас тойже:

Радуйся, от нас Святая Богородице Дево, /
чистый сосуде всея вселенныя, / свеще
неугасимая, вместилище Невместимаго, / храме
необоримый; / радуйся, из Неяже родися Агнец
Божий, / вземляй грехи всего мира.

На стиховне стихиры, глас 5.

Подобен: Радуйся:

Радуйся, благочестия поборниче, / праведне
отче наш Феодосие, / Православия столпе
непоколебимый; / радуйся, чудотворче
преславный, / теплый наш предстателю пред
Богом. / Емуже выну предстоя со всеми
святыми, / молися о спасении душ наших.

Стих: Праведник, яко финикс, процветет, / яко
кедр, иже в Ливане, умножится.

Радуйся, боголюбивых пастырей украшение, /
Евангелия Христова деятельный проповедниче,
/ покаяния учителю и молитвы усердный
делателю; / радуйся, многих любовью твоею
согревший, / и до ныне не престающий миловати
всех, / верою приходящих под всечестный
покров молитв твоих.

Стих: Блажен муж, бояйся Господа, / в
заповедех Его восхощет зело.

Радуйся, священночестне Феодосие, / жилище
Духа Святаго, / сосуде избранный Божия
благодати; / радуйся, болящих целителю, /
печальных утешителю, заблудших путеводителю.
/ Настави и нас, отче праведне, / ходити путем
богоугодных исправлений твоих / и помяни нас
в молитвах твоих ко Господу, / прося нам у
благости Его велия милости.

Слава, глас 8:

Добродетелей твоих, священне отче, / плод
просветил есть верных сердца. / Кто бо, слыша
безмерное твое смирение и терпение, не
удивится? / И еже к нищим тихости / и к
скорбящим утешению / вся Боголепно научил
еси, праведне отче Феодосие, / и ныне на
Небесех неувядаемым венцем увязлся еси, /
моли о душах наших.

**И ныне, Богородичен, глас тойже: Безневестная
Дево:**

**На благословении хлебов тропарь святого
дважды и Богородице Дево: единожды.**

Тропарь святого, глас 4:

Покаяния проповедниче, Православия
наставниче, / Церкви Русския похвало и града
Балты священное сокровище, / Феодосие
преславне, / престолу Божию предстоя, / моли
спастися душам нашим.

На утрени

По 1-м стихословии седален, глас 1:

Иерусалима Горняго жителя, / святых сонма
сопричастника, / праведнаго отца нашего
Феодосия возвеличим, / благодарованныя мощи

его облобызающе, возопиим: / моли, блаженне,
прилежно Христа Бога, / спаситися душам
нашим.

Слава, и ныне, глас тойже:

Невесто Неискусобрачная, / Премудрости село
показася утроба Твоя: / Ты бо едина, Мати
Божия, / благих Ходатаица явившися, / всяких
страстей избави рабы Твоя, / непрестанно
воспевающая славу Твою.

По 2-м стихословии седален, глас 3:

Отче предивне Феодосие, / ты в житии твоём
тело духови поработил еси, / сего ради по
смерти твоей нетлением процвел еси / и
источник исцелений верным явился еси, /
темже ты любовью почитаем.

Слава, и ныне, глас тойже:

Чертог, присносущною славою украшен, видяще
выну, / желание имамаи совнити в онь, / но,
одежды не имуще, стыдимся, / да не связаны от
Ангел и извержени будем. / Ты, сущи одежда
нагих дерзновения, Дево Марие, украси ны / и
введи внутрь Небеснаго Чертога.

По полиелеи седален, глас 8:

Честный и светоносный твой, отче, праздник, /
исполнен есть радости и веселия духовнаго. /
Темже сошедшися, монахов множества и

христоименитии людие, / возвеличим
неизреченная чудодейния твоя, / имиже, яко
крин во юдоле, процвел еси, / облагоухаяй души
наша и чувства, / Феодосие отче наш, / моли
спастися душам нашим.

Слава, и ныне, глас тойже:

Богородице Дево, / Вседержавная наша Царице,
/ омофором молитв Твоих покрывающая весь
мир, / прими от благодарных сердец наших /
похвальныя песни сия / и испроси нам у Сына
Твоего Богоначального / грехов прощение и
велию милость.

Таже степенна, 1-й антифон, глас 4.

Прокимен, глас 4: Возвеселится праведник о
Господе / и уповаеет на Него. **Стих:** Услыши,
Боже, глас мой, внемда молитимися к Тебе.

**Всякое дыхание: Евангелие от Матфея, зачало
16.**

По 50-м псалме стихира самогласна, глас 6:

Псаломски процвел еси, яко финикс, / в посте и
подвизех, Феодосие славне, / милостынею
Всещедрого Господа к молитвам твоим
приклонил еси, / и бесовския полки
прогоняеши, / и даруеши цельбы независтно
всем. / Темже житейскими помыслы ум наш
мятущийся уцеломудри, / да чисте воспоим
Христа Бога нашего.

**Канон святому, глас 2,
егоже краегранесие: Богоданнаго пресвитера
Балтскаго пою.**

Песнь 1.

*Ирмос: Грядите, людие, поим песнь Христу
Богу, раздельшему море, и наставльшему люди,
яже изведе из работы египетския, яко
прославися.*

Благословенное слово подаждь ми,
Вседержителю Господи, по достоянию воспети
служителя Твоего радательнаго, Феодосия
пастыря чуднаго.

Отец преискренний показался еси, отче
Феодосие, пастве твоей, любовь свою
согревающий сердца чад твоих.

Господень возследователь явился еси и
апостольскаго духа приятелище, отче
досточудне, не остави нас, благодарне о тебе
Богу поющих.

Богородичен: Обрадованная Гаврииловым
возвещением, Приснодево Чистая, рождающая на
радость всех Бога, спаси молитвами Твоими
Богородицу Тя почитающих.

Песнь 3.

*Ирмос: На камени мя веры утвердив, расширил
еси уста моя на враги моя. Возвесели бо ся дух*

мой, вегда пети: несть свят, якоже Бог наш, и несть праведен паче Тебе, Господи.

Деятельнаго Евангелия проповедателя ублажаем тя, отче наш Феодосие, да молитвами твоими просветит нас Господь повелении Своими.

Адовых узилиц Решителя верный ученик обрелся еси, отче Феодосие, таже и нас управи во след заповедей Божиих ходити.

Надежду всю в житии своем на Господа полагаал еси, Феодосие богомудре, унывающих нас преободри, да благодушно славословим Промыслителя нашего Господа.

Богородичен: Ненасеянная земле, глаголом Божиим прорастившая Божие Слово, Того моли, Всепетая Богородице, избавитися нам от всяких зол и напастей.

Седален, глас 4:

Старца Богомудраго и пастыря предивнаго, Феодосия отца нашего и чудотворца славнаго, почтим днесь, вернии, во псалмех и пениих, и, любовьию возвеличим, просяще у Господа того молитвами велия милости.

Слава, и ныне, Богородичен:

Покров Твой, Дево Богородице, простри над смиренными воспеватели Твоими и сохрани нас от бед и скорбей, матернюю любовь к нам недостойным являюще.

Песнь 4.

Ирмос: Пришел еси от Девы, не ходатай, ни Ангел, но Сам, Господи, воплощся, и спасл еси всего мя человека. Тем зову Ти: слава силе Твоей, Господи.

Агнца Божия закалаемаго за грех всего мира зрел еси сердечными очима, отче, священную Евхаристию совершающе, таже и ныне воздержи твои праведнии руцы к Престолу Божию за люди твоя, тя почитающих.

Горняго Иерусалима всельник еще в житии твоим был еси, отче приснопамятне, помози и нам наследовати благая на земли живых.

Облистай нас светом жития твоего, отче Феодосие, да во тме греховней пребывающих наставиши нас на пути спасительныя заповедей Господних.

Богородичен: Пречистая Дево Богоотроковице, матерним Твоим взором призри на нас, страстьми плененных, и от рова греховнаго изведи нас.

Песнь 5.

Ирмос: Света подателю и веков Творче, Господи, во свете Твоих повелений настави нас; разве бо Тебе иного бога не знаем.

Радости присныя причастник являешися нам, пастырю наш богомудрый Феодосие, и

наследник Царствия Божией славы, темже ныне
ублажаешься с лики святых.

Ересей дерзновенный обличитель и мятущихся
душ богодухновенный окормитель явился еси,
Феодосие славне, посрамляюще немощныя
дерзости богопротивника древняго.

Суд Божий над миром близ грядущий возвестил
еси, отче Феодосие, Илииною ревностию
исполненный, проповедал еси покаяние и жития
исправление.

Богородичен: Вседержителя Господа явилася еси
вселение, Мати Препоблагословенная, идеже Бог
человеку сочется.

Песнь 6.

*Ирмос: В бездне греховней валяясь, неизследную
милосердия Твоего призываю бездну: от тли,
Боже, мя возведи.*

Изгнание, клевету и злобу людскую претерпел
еси, отче добропобедне, всюду упование
возлагающе на Господа Спасителя твоего.

Тихостию нрава и кротким житием своим
растерзал еси мрежи клеветника и завистца
перваго, сего ради имени твоего духи злобы
трепещут.

Естество ангельское удивил еси, отче Феодосие,
телесными подвиги твоими и любовью к Богу
пламенеющею, еяже ради источник

неоскудевающий чудес яви тя Господь людем Своим.

Богородичен: Радование человеком, ангелов прославление, Богородице Всечистая, спаси всех к Тебе прибегающих и Заступницу Тя в житии своем полагающих.

Кондак, глас 5:

Крест служения священнаго восприим, /
Подвигоположнику Господу последовал еси / и,
Тому усердно послужив, / многим образ
доброделания явился еси, / словесы и деяньми
на стезю спасения наставляюще / и путь ко
Христу указующе, / Феодосие богомудре отче
наш, / моли Христа Бога / да оставление грехов
подаст душам нашим.

Икос:

Богом прославленнаго пастыря, /
терпеливодушнаго скорбей житейских сносителя
/ воспоим днесь Феодосия богомудраго, /
милостию и чудесами богатеющаго. / Той бо
Небесную благодать приим, / врач изрядный
болящим показался еси, / исцеляет бо телеса
недугующих и души / верою притекающих к
мощем его. / Темже помолимся, людие,
новоявленному чудотворцу: / отче наш

Феодосие, / моли Христа Бога / да оставление грехов подаст душам нашим.

Песнь 7.

Ирмос: Телу златому премудрыя дети не послужиша, и в пламень сами поидоша, и боги их обругаша, среди пламене возопиша, и ороси я Ангел: услышася уже уст ваших молитва.

Алкая доброты Единого Бога и жаждающая славы Его, блаженне отче, славу земного пребывания преходящую оставил еси и яко угодник Владыки всех Христа просиял еси.

Божиим мановением роду нашему явлены быша честныя мощи твоя, отче Феодосие, сего ради освящение приемлем, Христу вопиюще: отцев Боже, благословен еси.

Алтаря Господня освященный служитель был еси, богомудре Феодосие, и яко пастырь истинный всеприлежное о врученном тебе стаде имел еси попечение.

Богородичен: Любоблагоутробная Мати, не престай о нас молящися, Дево, яко верным Ты еси утверждение и крепость Божественная.

Песнь 8.

Ирмос: В пещь огненную ко отроком еврейским снизшедшаго, и пламень в росу преложшаго Бога, пойте дела яко Господа, и превозносите во

вся веки.

Терпение преестественное стяжав, якоже столп непоколебим, пребыл еси, блаженне, вражия стремления безстрашно и стрелы клеветы и напраслины приемля, зовый: благословите Христа во веки.

Священныя мощи твоя, обогащияся дивными чудесы, проповедают небесную славу твою, и милости твоя явленныя роду нашему понуждают звати: благословите Христа во веки.

К тебе, отче Феодосие, припадающе, умиленным гласом вопием: посети немощи наша, буди ходатай о нас, тебе ради благословящих Христа во веки.

Богородичен: Агница Непорочная, Рождество Свое на Кресте распинаема зрела еси, грех мира сокрушающее. Темже Тя, Мати, чтим во вся веки.

Песнь 9.

Ирмос: Безначальна Родителя Сын, Бог и Господь, воплощься от Девы нам явися, омраченная просветити, собрати расточенная: тем всепетую Богородицу величаем.

Граду твоему заступник и паствы твоея хранитель буди, всех же чтущих любовию память твою, отче, неборимым молитв твоих предстательством огради.

От бед и скорбей нас, чудотворче Феодосие, избавив, во благочестии преспеяние всем даруй, да ты, ходатая о нас, величаем.

Песньми священными прославляем подвиги твоя, блаженне отче, ты же умилосердися над недостойными воспеватели твоими и коемуждо на помощь и утешение милость подаждь.

Обрати свой взор с превыспренних высот на нас, в памяти твоей ликующих и Христа славословящих, и отеческим твоим благословением осени всех, пастырю священнейший Феодосие.

Богородичен: Юзилиц адских Опустошителя рождшую, Чистую Деву, Матерь Бога Слова, в песнях хвалебных присно величаем.

Светилен, глас 2:

Богом возженный светильниче Церкви пресветлый, Феодосие отче наш, освящение испроси душам нашим, твоими теплыми ко Господу молитвами.

Слава, и ныне, Богородичен:

Славословие Тебе приносим, Мати Дево, явившей миру Свет Присносияющий, тьму неверия и греха расточающий, и присною радостью души наша исполняющий.

На хвалитех стихиры святаго, глас 4:

Яко светило просиял еси / подвиги и терпением,
отче Феодосие славне, / явився благочестия
твердое основание / и стена незыблема граду
Балте, / мироплетенную красоту презрел еси /
любве ради Вседержителя Бога, / Егоже о нас
моли, / усердно творящих всечестную память
твою.

Воспеваем житие твое многострадальное / и
чтим в Горняя преселение твое праведное, /
лобызаем честныя мощи твоя, / токи чудес нам
источающия, / и празднуем радостно
всесвященную память твою, / богоносе,
блаженне отче Феодосие.

Притецем днесь вернии, / к мощем праведнаго
отца нашего Феодосия, / и пролием пред ним
моление / и скорби возвестим сердечныя / да
обрящем утешение велие, / той бо есть пастырь
благостный и помощник скорый: / всяк бо
веруяй не отыдет тощ.

Явися нам источник спасения / и река
цельбоносных вод / гроб пресвитера балтскаго
Феодосия, / струи исцелений изливая, /
приидите, почерпем усердно вси / злолютых
всех избавление.

Слава, глас 2:

Приидите, вси вернии, / духовно торжествуйте,
/ приидите и видите, / еже ныне явися от

вещественного сосуда, / невещественную благодать, от гроба богомудраго Феодосия кипящую, / к нему же с веселием возопиим, глаголюще: / о всеблаженне отче, / Христа моли непрестанно спастися душам нашим.

И ныне, Богородичен, глас той же:

Архангельский глас вопием Ти: / Радуйся, Благодатная, Господь с Тобою; / радуйся, Благословенная, / Заступница наша и скорая в бедах Помощница, / Тобою бо мы паки рай обретохом.

Славословие великое и отпуст. И бывает помазание братии от лампы святаго.

На литургии

Блаженны от канона песнь 3-я и 6-я. Прокимен, глас 4: Возвеселится праведник о Господе / и уповаает на Него. Стих: Услыши, Боже, глас мой, внемда молитимися к Тебе. Апостол ко Ефесеим, зачало 233. Аллилуиа, глас 4: Праведник, яко финикс, процветет, / яко кедр, иже в Ливане, умножится. Стих: Насажденнии в дому Господни во дворех Бога нашего процветут. Евангелие от Матфея, зачало 11. Причастен: В память вечную будет праведник: